



Sesida dals

Communitgà ils

Protocol nr.

18 da favrer 2025

20 da favrer 2025

89/2025

Dumonda Righetti

concernent l'utilisaziun da programs d'intelligenza artificiala (IA) ed il consum da products dad IA tras giuvenils

Resposta da la Regenza

L'intelligenza artificiala (IA) sco er autras tecnologias modernas èn in aspect impurtant da la transformaziun digitala e chaschunan midadas essenzialas en tut ils secturs da la vita. La Regenza è conscienta da la gronda impurtanza da quests svilups. Applicaziuns dad IA che vegnan stgaffidas da nov signifitgan tant schanzas sco er ristgas. La protecziun dals giuvenils cunter eventuels privels tras novas tecnologias, inclusiv la IA, è ina finamira da tut ils posts da servetsch chantunals e da tut las instituziuns chantunals en l'ambient da la lavur cun giuvenils. Questa tematica na pertutga dentant betg mo in chantun singul, mabain pretenda in'avischinaziun coordinada sin plaun naziunal ed internaziunal. Il chantun persequitescha attentamain ils svilups en quest sector.

Tar la dumonda 1: Las cundiziuns per la scolaziun da las scholaras e dals scholars en pedagogia da medias èn fixadas en il modul «Medias ed informatica» dal Plan d'instrucziun 21 GR. Il Post spezialisà per la promoziun da la sanadad da l'Uffizi da sanadad dal Grischun rinforza la cumpetenza da medias d'uffants e da giuvenils e metta a disposiziun a las scolas materialias da sustegn davart ils temas «medias digitalas» (be-freelance.net) u «dependenza da l'internet» (gr.feel-ok.ch). Novas avischinaziuns, sco lavuratoris da l'uniun Netpathie che sa drizzan er als geniturs ed a persunas spezialisadas dal sector ordaifer la scola, vegnan evaluadas l'onn 2025. Il Post spezialisà Prevenziun da la Polizia chantunala instruescha dapi l'onn da scola 2023/24 «prevenziun da giuvenils» cun il tema central «cybermobing» a partir da la 6. classa primara (2 lecziuns). En la 1. superiura suondan trais lecziuns davart differents temas, dapi il 2024/25 tranter auter er davart la IA. En la furmaziun fundamentala professiunala vegn il tema cuntinuà en l'instrucziun da furmaziun generala (IFG). Tenor ils documents d'audiziun tar il plan d'instrucziun general IFG da la Confederaziun duain las emprendistas ed ils emprendists analisar las schanzas e las ristgas da la IA e da l'emprender automatic e nizzegiar en moda raschunaivla ils meds

correspondents e las pussaivladads d'applicaziun respectivas. Il plan d'instrucziun general IFG entra probablmain en vigur l'onn 2026.

Tar la dumonda 2: Las consequenzas da la IA per la sanadad psichica dals giuvenils èn in tema da perscrutaziun impurtant, che vegn actualmain discutà en moda intensiva. La Regenza enconuscha cunzunt ils suandants studis davart l'utilisaziun da las medias e davart lur consequenzas: studi ADELE 2018 da la ZHAW e da la Swisscom. In studi qualitativ davart il diever da medias d'uffants svizzers da la vegliadetgna prescolara en il context da lur famiglia (zhaw.ch/psychologie/adele); studi MIKE 2021 da la ZHAW, da Giuventetgna e medias e da la Jacobs Foundation (medias, interacziun, uffants, geniturs). Cifras represchentativas davart uffants e medias en Svizra (zhaw.ch/psychologie/mike); studi JAMES 2024 da la ZHAW e da la Swisscom (giuventetgna, activitads, medias – retschertga Svizra) (zhaw.ch/psychologie/james e zhaw.ch/psychologie/jamesfocus); studi da HBSC (hbsc.ch, enquista svizra davart las scolaras ed ils scolars concernent il cumportament da sanadad e da medias) e lavur da perscrutaziun «The Future of Child Development in the AI Era. Cross-Disciplinary Perspectives Between AI and Child Development Experts» da Neugnot-Cérioli e Laurenty. Il studi accentuescha la necessitad urgenta d'in svilup infurmà e conscienzius da la IA, en spezial per applicaziuns ch'èn pensadas per uffants u che pudessan vegnir duvradas dals uffants. Sco facit èsi necessari da valitar las schanzas e las ristgas dal mund digital e da rinforzar la cumpetenza da medias, per ch'ils uffants ed ils giuvenils sajan segirs en la rait e per che lur sanadad mentala na pateschia betg.

Tar la dumonda 3: L'educaziun en il sector da la cumpetenza da medias è – sco l'educaziun en general – da princip chausa dals geniturs. L'infurmaziun che intermediatescha als uffants ed als giuvenils la cumpetenza da medias necessaria, sto vegnir promovida en il rom da la scola. Sin plaun naziunal ha «Educa» – l'agentura spezialisada da la Conferenza da las directuras e dals directurs chantunals da l'educaziun publica (CDEP) – elavurà in dossier spezialmain davart la IA en la furmaziun. Quest dossier ha l'Uffizi per la scola populara ed il sport (USS) tramess il december 2024 a las scolas popularas en ina newsletter. A partir da la fin da schaner 2025 vegn il USS a communitgar novas recumandaziuns per ir enturn cun la digitalisaziun en la scola populara.



En num da la Regenza

Il president:

Marcus Caduff

Il chancelier:

Daniel Spadin